

青山集卷第十五

當塗郭 祥正字攻父

五字古詩三十首

月下懷留二君儀

默坐兩股痺幽行整頭簪無家不成寐有酒何處斟  
山色九秋靜月華中夜深遙想端居人焚香哦妙音

寄題留二君儀田園碁石亭二首

磐石發天巧新亭君所營席展瑤琪滑坐久寒陰生  
遠瀑曳脩慢池山列蒼屏水田白鷺下霜樹青猿鳴  
回首同安縣殘陽樓觀橫不逢車馬來時愛牛羊經

童僕種刈畢父老搏蠱傾昇平信難偶歡笑聊舒情  
况攻李杜吟字字無淫聲春來成幾章想有基石銘  
人世無百歲塵勞枉營營豈如田園樂歌嘯送餘生  
况聞磐石上開亭石爲屏卷簾春雨足洗耳松風鳴  
孤鳥望中沒淡煙山際橫時復命兒息講道或傳經  
經罷哦五言珠璣滄海傾嗟我無羽翼往適幽憂情  
同蕭英伯登陳安止嘯臺

食訖雨初霽相將陟高臺縹緲臨諸峯慢卷濃雲開  
秀特不可掩每天碧崔嵬漳流欲赴海澎湃西南來  
陰陰荔子木合抱何年栽幽鳥轉枝語清風與春回  
佛宮四面出紺碧疑蓬萊高隱得斯地足以摠君懷  
方庭有蘭芷近郭無虎豺萬事不掛慮長年効僧齋  
一爲孫登嘯而與數子諧顧我病且老况復時運乖  
兒歸半道死旅棺未藏埋破甑已弃物乃非君子儕  
從遊得無玷泯默甘擯排

送廣東漕孫知損失官歸汶上

平生愛東州土厚人不罄見公惜已晚達論聳予聽  
五馳使者車中道罹陷穽開懷無怨尤得失兩以正  
歸程餘萬里脩然一煙艇鄉關今匪遙踴躍理三徑  
進則仗忠義退則樂溫清高卧固無必求才堯舜聖

亭亭南澗松愈老節愈勁柔柔水中蒲涵春自嚴靜  
百年未闔棺安之吾有命

讀陶淵明傳二首

我愛陶淵明超然遺世想一奏無絃琴妙曲寄玄響  
脩然聽以氣萬籟應諸掌舟車就所便丘壑信孤往  
泉涓木欣欣酌酒助俯仰酣醉頽雲煙舒嘯逸羅網  
斯人孰可見夢寐期髣髴兀如南山松亭亭植千杖  
陶潛真達道何止避俗翁蕭然守環堵褐穿瓢屢空  
梁肉不妄授菊杞欣所從一琴旣無絃妙音默相通  
造飲醉則返賦詩樂何窮密網懸衆鳥孤雲送眞鴻

寂寥千歲事撫卷思冲融使遇宣尼聖故應顏子同

普利寺白周上人高明軒

世人孰無累貴彼方外人超然雲霞趣迥脫生死輪  
周也漳南釋開軒瞰漳濱山光并水影二物長清新  
尤愛明月夕蒼林變金銀焚香坐軒上時或要靜賓  
幸無歌吹喧得與麋鹿馴嘗茶煮山藥長養菩提因  
豈慕富且貴寧憂賤與貧我來勿厭數從尔陶天真

同留二君儀登高明軒

羈客厭卑濕登軒喜高明紅日簷下度白雲窓半生  
并吞山川秀映帶樓殿平舟航濟吳楚笑語落蓬瀛

春風時一來百鳥相和鳴隔牆酒可沽千金為君傾  
既絕世上趣雅遂林中情勿云暮靄合更待孤蟾升  
同陳安止登高明軒

有客學清淨喜為林下游茲軒高且明駐策同其休  
目界既朗徹心官欣自由棄祿慕居士讀經親比丘  
雲樹樵聲遠石層春水流鳥羽瑩可數花光暖爭淨  
已知隔人寰日落山更幽適此悟無生餘事安足求

題淨惠院

方塘水未漲荷芰新展綠遊子愜輕衣步與孤雲逐  
初臨寺外橋已聽鍾聲肅徐登山後亭葱蒼翳松竹  
諸峯却羅列龍蛇互奔觸紅綃卷晴霞白雪落孤鷺  
了然身世忘豈念冠帶束平時謬持節善地甘厚祿  
更窮泉石樂曾未伸啓沃何以報君恩堯天漫凝目

題淨眾院贈蒙禪伯

南州三百寺此寺最輝煥石開千丈渠泉飛日華亂  
供僧無定負連床接雲漢經營始十載物物悉已換  
上人固多才不獨悟禪觀其師老黃蘗簡肅眾所憚  
承音既親切妙頂醍醐灌登門已清涼定步濟彼岸  
融融接軟語群疑自消泮每遊即忘還微風洒塵汗

題月淵亭



仰攀明月輪俯瞰滄海淵乾坤惜形勝此地何其偏  
靈溪九龍躍仙山一峯圓微紅散晴綺遠碧襯瑤煙  
幽香發野秀接語晉老禪緣何近城郭了無人世誼  
邂逅攝邦守所樂多林泉唯憂代者至不得經殘年  
老矣寧復來吟哦強留連他時考陳迹不滅斯亭篇

送范端仲推官

范君建陽客讀書過萬卷下筆又神速數預賢能薦  
省闈復擅場聲名動海縣一投紅蓮幕阻上金鑾殿  
志氣老不衰苦柏冒霜霰當塗少知己薄祿勢所戀  
君子困下僚倭士即華選顧我鴛鴦散才攝守頗優便

公庭可羅雀雲山復對面坐卧臨清風吟哦揮羽扇  
相逢始相樂瞥去若鷲電君行我幽獨送君聊自哢

池上晚景分得上字

秋風何處來蕭然洗炎瘴時要二三子臨池倒嘉釀  
逢辰既昇平覽景又清曠寂無人世喧頗覺神魄王  
雪鷺集滄洲金烏沒青嶂悠悠漁笛還漫漫潮痕漲  
黃蜂立蓮葉頰鯉吹萍浪始信莊生言觀魚樂濠上

漳南書事

元豐五年秋七月十九日猛風終夜發拔木壞廬室  
須臾海濤翻倒注九溪溢湍流崩重城萬戶競倉卒

馬牛豈復辨涯渚况已失嬰老相携扶迴首但悽慄  
憂心漫如焚救疹竟無術憶昨攝印初歲望頗云吉  
田疇時雨足秔糯各秀實胡為北陰恠平地遭滴汨  
尤嗟梁棟材中道摧折畢日月有常度金行正蕭瑟  
疇咨風雨師殘害昏天物天心本好仁忍眎久不恤  
況今太上聖治具嚴且密驅馬藏民間教兵授神筆  
四夷還舊疆百辟奉新律固宜集和氣祥瑞為時出  
緣何漳南民憔悴抱愁疾終當呼長鯨一吸見蓬葦  
臨漳亭觀水分得大字

憂民登危亭注眎萬里外溟濛雲氣浮勢與江海匯

蒼山恐低沈况復問畎澮禾麻安更論老稚念顛狼  
蛟鼉自出沒牛馬失向背雨師恣侵凌人理亦可罪  
舛舛非雷聲遠近屋廬壞君目正逢時上下宜交泰  
驅雲請白日朗徹照幽怪一雨即泐漫孰謂乾坤大  
送孫公素朝奉還臺

暑雨正鬱鬱陶流汗坐深甑忽聞公素來清風先滿徑  
高談別後事琳琅發吾聽聽之復何如五月冰雪瑩  
况逢至治朝日月開二聖大君用老成群辟要方正  
如公亦幾人尚未擢諫諍浮舟每經年山川寓幽興  
皇皇歲華晚曳屣漫吟詠行矣勿徘徊金門待新命

題妙勝院西軒并贈權師

老木不知年蒼藤已垂地高枝生晚陰低枝散涼氣好  
鳥時復來鳴聲似絃吹道人開小軒幽庭增廣庇  
眉霜雪頂休焉釋塵累餘功又及物丹砂和聲靈劑  
一粒愈沉疴未者四方至應接運真悲平等均我施  
相逢惜已晚殘光念如寄何當擇深山同師樂禪味

清江臺致酒贈范希遠龍圖

携手出煙霧致酒清江臺水淺橫沙露林踈遠山來  
白鳥一雙落青猿三可哀誰展摩詰圖而把淵明杯妙  
娥始七歲彈箏解晴雷或如鸞鳳吟喚得陽春回主

人亞父孫卓落王佐材高談使我聽明珠欲傾懷  
爽魄超太虛月窟無飛埃一飲不知醉浩歌忘草萊  
遲明擊雙權回首安在哉尺水公自養以待天門開

贈陳思道判官

自從梅老死詩言失平淡我欲回衆航力弱不可纜  
栖遲二十年時時漫孤噉忽逢陳夫子兩目海水湛  
爲我聊一吟粹芳超俗艷又如趙氏壁毫髮絕瑕玷  
愈多愈精好璀璨摘驪頷借令李杜在皮敵未應敢  
低頭亟趨降吞聲就誅貶招來君尚謙且曰吾與點  
窮朝把樽酒金竿紅浪颭胡爲眷幕府半百尚坎壈

幽蘭沒蕭艾明珠混野茨何當叩相閣斯人願收歛  
置之翰林中萬丈看光焰

鳳凰驛

晚泊鳳凰驛得名知謂何鳳凰不可見篁竹空婆娑  
四傍俱石崖一徑縈雲蘿慘慘陰欲雨淙淙澗跳波  
驛吏指英州兩舍皆平坡夕寒無瘴癘虛市饒鷄鵝  
我行旣已遠樂少憂常多過江紅葉舞度嶺黃鸝歌  
時序逼衰老羽翰鷲網羅一夕得佳處休焉聊獨哦

輪石

輪石如車輪削立萬丈壁湍流走其根倒影翠霧滴  
天公不推去此意人莫識雖無載輓功免有圓轉迹  
隔江欲登臨賃舟終不得旣乏官長威人事輕遠客  
胡爲秀絕姿往往在幽僻僮僕鷲日晚策馬苦相迫  
哀哉携妻子未暇往棲息沉吟復回首捨旃欲何適

題清遠峽廣慶寺壁

平明下碧落晚投清遠峽銀潢注地來翠壁連天挿  
中含五峯秀寺載三車法龍歸石有痕犀躡無遺押  
直釣誰得魚危磯待鷗狎長廊覽前題習之最爲甲  
物理求其全用材無乃狹渾詩亦可取小雨繞一霎  
未能臻甫白源長流不乏持盃聊酌茗清風爲停策



超然望日下嵐翠忽頽壓忍涕上孤舟低頭隨鴈鴨

次韻穎叔修撰遊朱明及字

朱明洞天門元戎要客入誰云蓬萊遠浮丘果相挹  
如超頓地禪曾不假梯級絲篁隔葱蒨沆瀣朗呼吸  
玉山有嘉禾鳳凰乃來集桃花尔何知濯濯紅露泣  
應嗟塵世人惚間白駒急行樂如之何不樂嗟何及

五仙謠

番禺五仙人騎羊各一色手持六秬穗翱翔遶城壁  
翩然去乘雲諸羊化為石至今留空祠異像猶可識  
曾聞經猛火毫髮無痕跡五仙寧復來三說頗難測

只憂風雨至半夜隨霹靂君不見羗廬劉越之洞天  
萬象森羅無一尺

誌遊呈蔣帥穎叔

焚香瞻五仙登樓瞰滄海題軒名雙林却酒飯蔬菜

五仙觀山海樓還趨法性寺爛漫發幽晦房公潤經處

與化寺二軒蘭苗遺芳在房融潤色老木已千年成林播佳話藥止

云此樹下當有菩提危壇半頽缺曾傳祖師戒即六祖也今

薩受戒度人成林達多與制止古像各瀟灑歸時已殘陽心淵生沆瀣

蘭亭世俗飲尚足傳異代佛境清淨緣浩劫永不壞聊

誌一日遊結交向方外是日與穎叔二人者同遊

再和穎叔誌遊

君為五羊仙我効退之拜默契如來禪安用傳畫繪  
 滄海雖云闊萬里有限際音債請從造物論一瞬即破  
 碎靈龜胡為靈鑽灼爛腹背生能發幽寃神理助奇  
 恠見五羊天慶觀龜事晚投古寺食葷味不如菜摩浮庭下碑  
 百歲蒼蘚晦忽逢潤經處房公儼如在度人要成林  
 今已播禪話勿為殺盜淫佛勅所告戒種子積無明  
 應須法雨灑幸陪蓮社緣彼此吸清漑噫嗟繫軒冕  
 憔悴塵垢態一朝趨地獄苦惱孰肯代瑩如摩尼珠  
 誰使濁水壞與公誌斯遊浩蕩形骸外

獨遊藥洲懷穎叔脩撰

驅車欲何適獨往觀藥洲荒蘆暄鳥雀恠石森龍虬  
 大亭插層城玉虹跨深溝雙門控西渚石門也九星聚  
 中流九曜石也其名何壯哉像兒儼可求張王卷國去故  
 物唯此留滄溟霸氣滅落日孤煙浮空畦已無藥草  
 蔓春柔柔常年一百五載酒傾城遊炎炎二聖作德  
 澤覃海陬大帥用文儒靜鎮十五州請公握鴻筆刻  
 蘇揮戈矛仍要水官月一笑挹浮丘蓬萊自茲往穩  
 踏金鼈頭

九曜石奉呈同遊蔣帥穎叔吳漕翼道

番禺西城偏九石名九曜危根挿滄浪古魄鎮臨眺  
何人試巧手鑿此混沌竅森森毛髮散偉偉儀形肖  
葱蒼翠霧濕玲瓏秋月照痕添海潮上聲酸朔風叫  
龍歸憂利劍鼉泣怖長釣曾非借霹靂安得離去巖  
嶠菱溪與太湖所得信未妙誰將置濠隍我願植廊  
廟堅貞以類舉邪僻令遁趙濡毫勒陰崖卑語君勿  
誚

青山集卷第十五

青山集卷第十六

當塗郭

祥正字功父

五字古詩三十首

和穎叔遊浮丘觀

潭潭洞天門孰出朱明右突疑雲翼張竦見冰骨瘦  
飛仙時往來別有通海竇此事僅傳聞世人豈能觀  
歌簷榛棘合壞壁青紅舊汲泉鍊丹處頽毀無完甃  
不逢博物人妙迹誰復究黃冠稟使拍乘時力營構  
飛閣凌滄波誅林逐群狎松蘿翠欲滴蘭茝芬可嗅  
秋蟾助餘魄蓬島分小岫披披宿藹散泠泠諸籟奏

超然俗念急揮手出宇宙况逢老集仙氣奪天下秀  
落筆成千言霹靂震白晝於茲惜分携作惡須摻袖

穎叔招飲吳圃

五鼓開畫戟平明出重闥小橋分野徑吳圃會眾賓  
番禺二月尾落花已無春唯有薔薇水衣襟四時薰  
短垣乃浮丘樓觀何斬新我公發幽晦輸金走車輪  
蓬萊飛一島雲物拖晴紳此景在眉睫圖繪未必勻  
從來不彈弋傍砌鳥雀馴寄語北海若停風護松筠  
負才詩傲敵縱酒吞湖漚酌安足辭不飲終成塵  
逍遙一日事浮脆百年身何須跨黃鶴追彼瑤池人

但當聽公歌賣交斥張陳達道齊生死筆端真有神  
揮灑十八韻一一無價珍老彼杜工部立哉揚子雲

鵠奔亭呈帥漕二公

新江自南來西與端江匯寒光入靈羊一碧浸羅帶  
屹然鵠奔亭遺音溢千載羽儀莫可見窈窕想姝態  
遭戕瘞同坎襦布久不壞許宛如生平隱顯一何恠  
讎人闔戶戮化質轉風使且將憂患辭浩蕩煙霄外  
鳥飛并劍躍類與神靈會物變固難窮撫事增感慙周  
侯昔行部美績此尤最江生引為言建平平捐罪宋  
興跨唐虞乾坤正交泰皇華命俊哲枉橫無纖芥琳



琅斯亭篇證古欲陳戒殺人貴滅口覆族竟自敗姦  
史誅既死潛德發幽晦堅珉可磨鑄榮光庶長在

端州逢故人劉暉光道致酒鵠奔亭作

貴池昔分袂端江復傾蓋屈指十六秋華髮驚老大

雲霄邈功名荆棘森患害眾人皆欲戮出門即有礙

上杜句吐哉不復道致酒強高會蒼梧帝魂寂鵠化

遺亭在翠葆櫻玉簪金鱗躍羅帶韓云江似青羅帶山如碧玉簪

風澄嵐靄散擢擊天影碎往古悉已空來今竟何待

勞形百年間投足萬里內秋水正泚漫醉膽逐澎湃

一絲携六鼇猛擲滄溟外

將歸三首

春田豈不美春園亦可佳田水流泑泑園禽語啾啾

荷笠復携鋤動作頗自諧隣叟三五輩擊壤歡無涯

祿仕四十年志運良已乖許國既無補陷穽幾沈埋

皇恩湛昭洗印紱蒙優差內循齒髮衰愧彼英俊偕

休焉保其終飛章乞殘骸將歸樂復樂清風掃孤懷

結廬謝山下門荒蘿徑深寂無車馬跡而有猿鳥音

高峯落日盡遠壑歸雲沈死生一吾趣長嘯亡頭簪

勇往復此樂俛仰安可任垂老度庾嶺西江守端州

逾年忝祿食歸思忽驚秋結廬丹湖邊種木菓屢收

掛冠已不早玄花隨兩眸休休保殘齡擊壤歌皇猷  
有兒集吏選餘事復何求回首天地恩瞑目終難酬

贈上藍晉禪師

泐潭月公晦其禪妙諸方傳之晉伯明獨步入豫章  
一登上藍座日月回輝光問法瞻文室方廣不可量  
人人得甘露灌頂心清涼又通世俗書落筆皆文章  
衆鳥難悉名卓然唯鳳凰羽儀下雲霄五色在山岡  
先帝昔臨御京城開寶坊明詔求法才衆老爭低昂  
惟師不妄念安之如太行乃知北遠師駕幸不下床  
所傳信匪訛千載兩相望篁竹架清風喬松裛寒霜

回心剃鬚髮永願陪翱翔

望廬山懷陶淵明

羗廬初在望復憶柴桑翁醉來卧磐石悶默天地通  
不入惠遠社自彈無絃桐悠悠出谷雲漠漠栖林風  
倚巖片月白落磴寒泉洪此意非眇聽遙知與君同  
追和韋應物廬山西澗瀑布下作

徘徊西澗下聽泉濯煩襟煩襟遂蕭爽妙音非世音  
不知歧路絕貪翫煙蘿深芥子未嘗入高材自成林  
鶴鳴豈有怨雲去本無心寥寥陸簡寂古意難追尋

宿栖賢寺

遙憐李太白吟望瀑布水不知三峽流翠洒虛煙裏  
雄聲雷雨驟遠響松風靡誰留千丈虹長在雲根倚  
遂令車馬來朗瞻樓殿啓明明銀色界浩浩蟾波洗  
居中梵天衆聞思悟玄理長老乃摩詰取供在彈指  
普薰毛孔香真實超凡鄙病夫寄一榻清冷耀心耳  
飄然睡魔去策杖中夜起不能跨鯨魚揮筆信非美

宿歸宗寺

曠懷王逸少宅地如翔鸞池水至今黑云是墨未乾  
施作金仙宮樓殿排羽翰銀榜留飛鳥玉蜃吐鷲端  
耶舍寶塔近筆插青雲端貝葉五千書兩藏龍鱗蟠

鐘磬遮虛籟松杉扶歲寒護持不變滅鑪煙晝漫漫  
暫遊寄僧榻翛然心界寬愧無警絕章村與蒼崖刊

新昌吟寄穎叔待制

元祐丙寅冬新昌有狂寇名探其姓岑厥初善巫呪  
南民欣尚鬼來者爭輻輳經年惑群衆詭術遂潛構  
摧城止三闕作蜂唯撒豆竹竿變鎗旗銳兵莫吾闔  
此事古未聞造意無乃陋蚩蚩彼何知丁壯擁前後  
長驅向城郭塵土翳白晝刺史亟閉門神理默垂祐  
城頭無百兵坐待五羊救賊中衆所見戢戢羅甲冑  
須臾薄音博寒陰凍立多僵仆平明若鳥散賊本未遑

究權帥計倉卒遣將速誅蹂貪功恣殺戮原野民血

溜嬰兒與婦女屠割僅遺脰傳報及南昌新帥若煙

走有頴叔至洪聞賊報即星馳度嶺入境亟止殺渠惡

用機購逾旬果獲探霄斬餘悉宥朝廷方好仁帥略

寔能副臺章請褒賞詔語優以懋撫綏聊借才侍從

尔來復身居江湖上名近日月右記上略制麟兒隨

飛龍戊辰季嗣陰隲資貴富彼美南山松亭亭千丈

秀終為廊廟器未許連城售吳毛持漕節文彩爛錦

繡發為新昌行洪鍾待誰扣我將磨蒼珉為公悉鏡

鏤運判吳翼道毛正仲皆作此詩見

### 送許栖默道士

結廬守親塚淡食畢喪制焚香誦寶經傾悲拔冥滯

神明扶孝思肌髮保陽氣支離僅不死隣里為歔歎

倏然叩子門躬勤謝銘誌袖携一幅圖离坎備形勢

明堂正丘穴松檟列新翠身雖離塚傍披圖即流涕

拏舟遽言別諱日仲春至酌水採嘉蔬藉草具嚴祭

又言廣栽植薄取歲時利事死如事生終焉達斯志

儒者似君稀况復褐冠類誰為孝子傳吾詩信無偽

### 送胡推官赴無錫丞

愛山不離山君來訪山間山間只欠水聽君語潺潺



滋我山色秀洗我塵心煩如何遽言別鸞驂欲翩翩  
試才得佳邑割鷄鳴刀鏤雙親尚未老伯氏趨朝班  
藍田玉一雙浮出濡湏灣天作王者瑞寧獨名鄉關  
自憐困已甚風流邈難攀新詩儻許寄秋鴈無空還

送胡與幾被召赴闕

嗟我老已疲掛冠歸舊廬素乏二頃田無可把犁鋤  
窮年小山下獨伴千卷書作止隨古人襟懷稍欣如  
又無樽中酒能延故人車感君數相過氣豁眉宇踈  
天馬出月窟回薄萬里餘其才無不宜祿仕猶拘拘  
忽聞明庭詔一節馳輕輿往必陟臺省公言壯皇圖

潛心救世弊肯意爲身謨法密吏愈偷食衆財益虛  
末大本漸弱豈在專防胡指瑕一二人此事尤可吁  
細碎何足論綱舉網不逾譬彼脉已病其身尚膏腴  
要當速內究珍丸應時湏良醫望數公潤澤回焦枯  
願如范文正挺特真丈夫老死見太平委棄甘路衢

送馬東王朝散還臺

秋空若明鏡雲物瑩可數臨高送遠發况復瞰牛渚  
崔嵬水帝宮半出燃犀浦橋基插波瀾王氣逐龍虎  
歸艫豈能留兩槳幾欲舞重光瞻舜日群材入天罟  
聃聃馬東玉松柏奈寒暑五載佐吾邦大匠善規矩

仁民而愛物巨細各有補宴閑集賓朋風流照樽俎  
能詩又敏速往往造險語文章久薦達名聲動寰宇  
肯中蟠虹蜺行矣頃一吐伊予百無堪投老尚好古  
垂竿魚未食茹蕖口忘苦唯君最相知稱謂等鮑庾  
君歸我何適形影守溪澣時寄一行書焦枯望霖雨

謝涇川宋宰惠近詩

不到涇上邑倏忽二十載環山敞樓閣金碧想未改  
長溪拖翠玉洗月發光彩秋聲咽松杉夜氣馥蘭茝  
白鳥自成群黃猿行作隊仙人控鯉去巖下遺蹤在  
猶疑深雲中彈琴尚相待唐儒工翰墨石壁露璨璀

意有神明憐塵蘚不得浼地勝來俊哲宋子今出宰  
公餘綴吟筆爛熳排珠琲又如崆峒兵百萬森甲鎧  
寄我數十篇條然起沉痾肯中強搜抉舊學久荒餒  
欲追天馬蹤騫蹶竟難逮撫卷懷昔遊魂魄飛黥黷  
何當裂雲牋看君吐江海

寄杭州天竺辯才大師

我聞辯才師解空稱第一病子得摩頂其疾頓若失  
救物運真悲了心非幻術聲名動寰宇退身愈藏密  
峩峩龍井峯篔簹竹不透日終朝無來賓筇杖自橫脰  
此道何寥寥差有佛塵語無生無不生一以貫禪律

安得兩羽翰歸飛參丈室稽首慕高風天地相終畢

送外甥法真一師

仕祿不及養勇往學金僊棄家如脫屣壞衣披稻田  
見汝若見母令我涕泗漣我方齟齬時巨嶽遭摧巔  
汝母挈我往西江赴臨川愛育比其兒衣食無頗偏  
追隨二三載思親我言還是時汝未產顧今三十年  
汝壯我已老死者歸重泉悠悠記昨夢幻妄真可憐  
汝能逃世累趣尚固已賢京華勿久棲還當擇深淵  
返窮生死本勿爲言句纏拭我衣上淚贈汝金石篇

送甥沈濟秀才下第南歸

炎風吹黃塵去興不可止丈夫固有命得失致悲喜  
何當永相將錫山酌泉水

送胡子企大夫還臺

聯鑿出梅山倏然二十載君嘗佐天府我遂泛雲海  
音書魚鴈絕夢寐想風采管車忽來過笑語珠璀璨  
故交悉相忘而君獨不改天王堯舜資化柄付良宰  
網羅收鴻鵠臺閣茂蘭茝君歸必殊顯發策救民痍  
形容入凌煙丹青永無浼使我觀太平白首甘凍餒

投宿繁昌徐氏水閣

東池種蓮子西池養肥魚盈缸釀美酒滿盤具新蔬

客來徑一醉疑是桃源圖此事未足議弟兄皆業儒  
大弟已登科高名動鄉閭季弟復連薦豹變應時須  
長兄恬自養雲卧隨卷舒物至我則應隱德良有餘  
客有醉吟叟六月騎蹇驢避暑尋名山遂登君子居  
飲弄池上月一宿能清虛相看不相厭欲去且踟躕

和姜伯輝見贈醉吟畫詩

蒼崖一萬丈中瀉白玉泉飛鳥度不得而我長攀緣  
洗盡心地垢吟成元化篇更復有何物一搏當我前  
忽逢姜伯輝爽量涵水淵開談了無迹所得全於天  
便欲脫青衫泛我江東舡結交要終始相忘復頽然

徑呼妙手畫秋江霜景全冰輪正卓午照影無頗偏  
誰能騎蹇驢世路空留連咄哉可以往揮手從飛仙

觀唐植夫所藏古墨

黑龍蟠黑雲夕蟄黃金闕緣何落人間數餅若古月  
蝦蟆不敢蝕利刀詎能截溫潤北方玉芬香麝臍裂  
乃知廷生名栢栢久不滅植夫名世後彥範所畜號  
奇絕護以紫錦囊篋之復高鏑渺思五季亂江南頗  
偷逸三主皆能書撥鎗聳瘦骨一朝歸大明流散餘  
故物金華座右銘清涼自題佛二寶藏予家時時一  
披拂及觀植夫墨清風愈飄忽異國想塵勞精靈豈



沈沒聊爲識古篇分手各蕭瑟

酬富仲容朝散見贈因以送之

牧之吟齊山太白詠秋浦至今三百年光焰不埋土  
我朝文愈盛往往出前古仲容生相門璨然鳳凰羽  
作鎮簿書閑盈編金玉吐牧之何足論白也真尔汝  
一朝解符歸暫泊采江滸肩輿過蓬蓽高談辰及午  
洗我塵坐聽不覺歡欲舞又如熟黃梁連食釋飢苦  
昔聞鄭國公片言戢狂虜廟食配神宗昭昭仲山甫  
今逢族弟賢家法中規矩郎省寧淹回往自結明主  
不唯唐蕭家繼踵登相府請驅千里雲時作三日雨

宿鍾山贈泉禪師

夜半松栢響繞巖鸞鳥鳳音披衣送遐眄明月方庭深  
樓殿遍瑤層寶塔棲中岑定分付刀赤世故仍癡淫  
六朝遺破塚四聖崇幽林香厨飯玉粒千歲聞于今  
况逢大道師妙傳諸佛心其徒五百人坐忘靜沉沉  
寶光冰琉璃永無塵垢侵何以明歸仰頓首興微吟

送倪悴敦復往池州決獄

忽領外臺檄離家不辭艱破雪陟遠道侵星出重關  
提刀聊四顧決獄談笑間且經五峯寺遂登九華山  
朗飲雲泉秀妙依松石開琳琅如得句先寄南風還

送敦復至觀音寺再用前韻祝別

大道既如砥安輿寧險艱通溝水决决出林鳥關關  
紫詔下天外黃氣生眉間歸當趨玉陛豈容眷名山  
接物齊彼分存誠肅吾閑我心如路草願君與春還

陶然軒呈孔椽

我醉不在酒心常醉於天出處無固必四時在陶然  
世網誰拘拘冥鴻自翩翩隱几樂吾樂陶然名此軒  
採掇富菊杞芬香藉蘭茝啼鳥助春喜相呼語涓涓  
好風集清微時寫朱絲絃秋月瑩池上臘雪堆簷前  
客來亦把酒客去還醉眠爲君發短調意將千載傳

青山集卷第十六

青山集卷第十七

當塗郭

祥正字功父

五字古詩三十首

安中尚書見招同諸公登雨華臺

城南五里近驅車稍停休層臺臨古刹欣陪清淨遊  
凭高送遠目考古思名流更讀琳琅篇叙事何其周  
尸黎與法雲接跡居崑幽趣將金僊諧行匪邪徑由  
至今手植松千丈騰龍虯悟發特異衆妙齡已依劉  
天華無根蒂應講來飛浮帝釋昔舉手此理誰可侔  
迺來表前蹤新亭歷鰲頭空渚栖古月大江浴清秋

曠懷出十地壯氣橫九州三山連天門水府卧金牛  
故國羅綺滅深宮榛莽留興亡千歲間愁緒如線抽  
惟餘北嶺雲無心自悠悠高鴻正飛冥羅網安得收  
公等真丈夫問學皆淵丘不應持使旄歸合登瀛洲  
栢栢鼎鼐司落落金馬儔君臣若堯舜明良互賡酬  
胡爲慕瞿聃玄微解而優願舒三日霖慰此旱歲求  
軋坤涵潤澤使我醒兩眸咄嗟勿重陳玉樹後庭謳

送李嘉甫朝散還臺

春風連作惡吹雪深尺五元宵無燈火閉關與誰語  
忽聞營從過傾蓋挹眉宇相親如故人坐以加循撫  
蓬茅只數間餘無一丘土半俸足以飽未嘗詣州府  
白雲寓遠目清溪照靈腑趨閑已忘憂浩歌惟汲古  
明公志方壯富貴行可取協韻高才孰能當如罷亦如  
虎致君爲唐虞澤民作霖雨功名垂軋坤兒孫列簪  
組於予一何遼而能強相與聊書送行章欲以明出  
處

前春雪

玄冥奪春令連旬雪塞屋嗷嗷何物聲云是饑民哭  
來請義倉米奈何久空腹寒威如戈矛命盡須更速  
憶昨去年水雲濤卷平陸高村旣無麥低田又無穀



民間已之食租稅仍未足縣令欲逃責催科峻鞭扑  
嗟哉吾邦民何以保骨肉昂頭訴蒼蒼和氣待春育  
春工本好生此雪無乃酷誰家敞園館草樹變瓊玉  
美人學回風歡笑列燈燭不知萬戶寒唯憂五更促  
世無採詩官悲歌寄鴻鵠

後春雪

前雪深尺五後雪深五尺動地北風惡連天凍雲塞  
通達絕行人萬物同一色燭龍爪生冰陽鳥背插翼  
牛羊何足論虎豹餓無食此雪昔未有父老均嘆息  
况當長養時玄冥翻怒赫我欲請雷車夜半轟霹靂

斗杓斡春陽和氣隨甲并溶為大田水青發壠頭麥  
南民少蘇醒白骨免堆積朝廷方體仁乾坤應合德  
有酒不敢飲獨樂神所責悲歌閉空屋寫慰同心客

送黃吉老察院

積學久未遇忠言今可施請君略細故吐出胸中竒  
悉救當世弊自結明主知不唯振憲綱進當司鼎彝  
用廣財已乏官冗人愈卑政寬法不舉將悞邊無威  
家家侈聲樂溥源變澆漓土木絢金碧佛仙競新祠  
此乃心腹疾豈止為瘡痍言者曾未及雖言多恚私  
苟非大姦邪惡足求瑕玼舉朝無字人何以裨明時

嘗讀喜似篇左右皆宜之乃知刺山壁天地終不遺  
去聖無變容誠明達神祇我方卧巖谷所友鹿與麋  
感君營從過枯木春風吹又如得黃梁慰我久苦飢  
承詔不敢留歡言遽睽違躬勤何以報報君以蕪辭

和敦復留題池州弄水亭

我寄江南隱數爲弄水遊讀君弄水篇感旣攀巢由  
赤脚踏雲雨投竿翫汀洲鷗鳥不見猜飛舞相應詎  
誰傾百斛珠跳躑無復收一發海客祕爛副貧家求  
李杜縮光焰王謝慙風流開卷起予興飄欲乘桴浮  
如觀秋浦圖晚景入兩眸愛之不能捨飢魚適吞鈎

嘗置几案間出沒窺崑幽一別幾何時歲月已十周  
跡滯若匣劍繡澁不可抽何當隨君車吟哦與君侔

謝胡丞寄錫泉十瓶

怜我酷嗜茗遠分名山泉茲山固多錫泉味甘尤偏  
幸遇佳客便十缸附輕船開缸漱清冷不待同茗煎  
想君民事休時時造泉邊入碾龍鳳碎浮甌乳花圓  
一啜未能止七盃誇玉川兩腋生清風飛逐蓬萊仙  
江心與谷簾校之孰爲妍欲報吾子惠仍思陸生賢

謝魏戶曹惠酒

官醪不許買兵醞未嘗得愁殺避俗翁甘爲獨醒客

緣何魏夫子仁心生憫惻雙壺輒分送涸鱗被甘澤  
鐺杓再施設併欲醉君德百川供長虹叱咤天地窄  
儘從秋來水大笑問河伯胡爲辨牛馬灑灑浮月魄

川漲

朱夏久不雨川源倏然漲三湖渺相連狂風蹴高浪  
蛟龍遁出沒魚鼈隨浩蕩群山悄低徊阡陌失背向  
嗟嗟圩中田一埂安可障去年已大潦十戶九凋喪  
幸賴官廩實顛顛命所仰官廩今已空農事未敢望  
理水竟無術祈禱俟靈貺退寸復進赤潮勢頗難量  
彼蒼罪斯民殺戮不以杖令人思禹功巍巍百王上

答魏掾招飲

我欲招魏子小山嘗白醪月華雖未滿已覺秋風高  
何物佐樽酌肥鱸并蟹螯一飲洗百憂軒冕稍可逃  
此語未及發辱君先見要乃知志趣同盍簪皆後僚  
亦應喚舞娥紅雲欲飛飄不然避謗傷淡話傾漁樵  
期歸一酪酲世事如芭蕉

酬彭法曹留題小山用次來韻

讀君小山詩語勢欲飛舞乃知甘與賈年少心則古  
又如東方生用之必爲虎子方坐空谷屏息避煩暑  
開緘揖清風不覺生毛羽雉之出入間瑤池贈王母

送黃彥發還臺

予方寓小山感君忽相過風標奪瑩玉氣語排懸河  
君初佩金印治蠻真有科彼侮我即斬威行濟之和  
使知朝廷尊帖帖無愆訛聖主方求才四海張網羅  
麒麟并鳳凰所獲寧爲多如君必見收爲君吟菁莪

酬陳掾留題小山二首用次來韻

我愛小山石翩翩鸞鳳姿胡爲不飛去似與幽人期  
志澤未及物收身聊自嘻不教三徑荒寧歌五噫詞  
舊交安在哉歲晏逢子知躬勤結惠好琅玕分一枝  
茲山何亭亭鬱有高人姿朝容白雲過夜與明月期

幽蘭翠碧秀好鳥鳴聲嬉更逢佳客來惠好留美詞  
遂令一丘樂能垂千載知躬勤謝陳子蒹葭倚瓊枝

和陳掾劾陶齋

君欲劾陶潛超然異今趣開齋即吾廬欣欣同所慕  
潛魚不群游栖鳥不返顧無意亦無我何思復何慮  
遂趨羲皇上日夕自休裕百年能幾何不知歲去暮  
終當隨白雲悠悠此山去

喜鍾山泉禪師見過

聞師飛錫來七日遠葦飲欣諧清淨談中夜未能寢  
師提寶公刀爲我裁古錦言歸不須忙溪上冰雪凜



送魏掾赴調

齟齬已承祿資賦况超邁三年瑩無疵一日析有代  
芳洲清風微夕浦寒煙霽翩翩莫能留逖巡遠山外  
浮生離合際志士懷耿介渺思歲月往俯眎天壤隘  
人驚甘羅少帝憶賈生對竟言若為期充實光輝大

送喻明仲朝請還臺

出馳使者星歲月一何久巨航始北歸華髮已盈首  
讀書過五車滿腹藏瓊玖行行赴金闕朝帝見太母  
乾坤運元氣斟酌須北斗願如范文正上疏發續難  
明明納忠諫聖作古無有道行且寄書慰我窮老叟

送倪敦復朝奉還臺

有力乃致遠中道力不任言歸閉空屋敢復求知音  
君來監郡務猥巷一見臨稱褒借陽春片礫成寸金  
觴酌每追隨嘯詠舒棕襟不覺三歲過啓櫂離江南  
協韻君懷有玉寶未嘗獻于今于今不往獻千載惜湮  
沈流景良可悲鬢雪來侵侵前途漸就窄後會安可  
尋屋梁見落月躬憂存我心猶期澤萬物霈然作商  
霖

邀敦復小酌為別

三年同賞梅梅花爛晴雪一日言北歸梅黃雨初歇

誰將金彈丸綴在綠枝上結實勝開花邀君更同賞  
食梅齒牙軟銜盃奈離憂過江桃李熟回首憶梅不

送楊縝供備還京

伯玉弘農侯頗頗真丈夫首雖我武弁滿腹藏詩書  
三年監郡兵一日云解符考之間并言公廉卒如初  
未嘗害一物縱捨乃有餘我方卧空屋坦跣與世踈  
感君數相過晨坐定及晡新詩并美酒問遺無時無  
老境重可惜遠別復何如羨君五福全客官奚拘拘  
子孫既祿仕京城富園閭精神趁強健優游早懸車  
祝君可以歸爲君吟歸歟

聽惠守錢承議談羅浮山因以贈之

久憶觀滄海喜君語羅浮浮從會稽來與羅相獻酬  
誰欲通兩山鐵橋跨山頭笙簫響瑤臺佛仙栖石樓  
靈光燭商舶七星被林幽飛泉難恙名異草香氣柔  
危峯聚白鹿深塢眠青牛葛洪安期生遺蹤尚綢繆  
攀巖瞰海水湛碧纜一甌不見波濤翻颶風駕龍虬  
又云朱明天飄然落遐陬方廣吞五嶽盤紆臨十洲  
不得預封禪自起煙雲着此理固莫測勝境輸君遊  
君語洗我耳我詩瑩君眸羅浮杳何許爲我商聲謳

送錢節七承議還臺

平昔未識面已景才業殊及來公謂家把酒情忻如  
分携八換歲益聞峻名譽我方姑熟隱君解惠國符  
鷁舟始去泊駕言過茅廬傾談洗塵聽積憂令我舒  
鳳窠無凡毛龍窟多美珠朝家正清明往矣涉亨衢  
澤民莫姚宋致主優唐虞史筆採循吏非君復誰書

自釋二首

去日不可追來日已無多衰頹復自念遷謝當奈何  
賢達并賤愚百歲同消磨不如詠觴酌徘徊眄庭柯  
流翠自成幄好風時經過憎愛理兼忘虛淡神所和  
運盡即隨盡葬骨南山坡

遭時如堯舜擊壤歡且歌歸田尚叨祿天寵固已多  
敢復邀長年寓景隨流波有酒即觴酌風日眷清和  
俯悲秦晉士含飢避干戈

懷友二首

夕陽在牕戶涼氣何處來微風泛庭柯蕭蕭歷空階  
抱琴一寫之冰霜滅孤懷但惜對樽酌而無良友偕  
聊將幽獨思滔滔寄長淮

晚坐庭樹下涼颼經我懷亦有樽中物佳人殊未來  
佳人隔重城誰復為之儕瞻雲雲行天步月月滿階  
想聞誦聲作崩騰瀉江淮

七月八日要闌公達承議晚酌二首

河橋散靈鵲曜景逾佳期池華延舒月尚可傾一卮  
欲以要良賓秋事言淒其歲往豈再得綠髮含霜滋  
寓意不在飲營駕君莫辭

營駕君莫辭寓飲不在酒得酒亦可喜話情庶延又  
鷺白不翳塵山光含美璞霞綺映池葩條蟬嘶露渥  
時平無橫去愁身退茲餘裕彈琴來薰風高軒良可  
佇

嚴氏西齋

立屋聚群經執經授諸兒趨善務深畜言行韜前規  
譬欲種嘉禾春膏力鋤犁一朝秀而實刈熟當如坻  
遂為道德飽用濟斯民飢庭木豈不美涼陰奉邀嬉  
池水豈不深濯熱臨清漪作止既可樂左右皆宜之  
瑤琴誰為彈倚聲奏吾詩

青山集卷第十七